

續河南通志




			九	漢
	一	〇	七	書
	〇	七	七	門
三	一	〇	七	類
二	二	三	七	
冊	架	函	號	

庫	文	閣	內
九	〇	七	漢
三	〇	七	書
二	二	七	類
冊	架	函	號

內閣文庫	
番號	漢 9077
冊數	32 (21)
函號	292 112

五十五六



續河南通志卷之五十五


人物志

列傳二

歸德府

崔掄奇字正誼夏邑人順治四年由進士授高淳縣縣
故有虛糧為民累掄奇力懇上官疏請永折著為令
又加意課士所拔識者多得雋秀後遷工部主事

王嘉生字美發睢州人震生弟順治己丑進士授建昌
府推官嚴稜自持民畏之如神明侃侃與直指面折
可否直指不謂忤每監兌漕糧軍弁欲以故例嘗輒
咋舌曰王公滿身風霜望之令人寒慄曷敢言後補



建寧府推官以憂歸

吳友名字輔臣商邱人順治十四年以遊擊防膠州鑿於海逆之變嚴肅隊伍輯和兵民與州牧協衷盡心保障陞卽墨營叅將吳耿之叛友名克捷斬馘無算收復名城十數進右都督逆平敘功予世襲拖沙喇哈番祀名宦

唐巍然字二有睢州人貢生仕撫州推官會知府羅織富人置獄罄其貲而斃之者七十一人巍然立揭于巡按御史卒抵於法御史受代巍然亦以毀去百姓爭留之

朱致字輝佳商邱人舉鄉貢以幹濟効力河工敘功銓

選擢汀漳道寬嚴互濟俗賴以靖遷福建按察使陞四川布政蜀地土滿人稀正賦不足供輸私派襍項民甚苦之致一意撫綏剔除殆盡調任湖南值墾荒陞科勢將貽累致縷陳利害定以上中下三則衆方樂輸後罷職卒於家

宋起字喜起商邱人由明經考授中書歷官刑部員外出守威寧府時諸苗梗化起疾行抵黎界單騎深入詔諸苗於庭示以威信蠻僚俯首服罪以功陞山東副使遷直隸布政司叅政督修永定河有績旋致政歸

陳宗石字子萬世居宜興祖於廷父貞慧爲東林復社

名宿宗石年十四贅商邱侯氏因家焉與伯兄維崧
才名相埒名公卿皆折節下交初授黎城丞擢安平
縣知縣以文學飭吏治豪右屏跡時湯斌巡撫江南
嘗舉以厲下曰為官若陳安平可謂三不負矣旋擢
戶部主事逾年假歸子履中履平

張禹謨字緒禹寧陵人登進士知米脂縣遷鞏昌府同
知以屯事六宜陳上官嘉納之著為令卒于官行笥
中惟敝衣殘卷而已

陳履平字勉夫商邱人隨兄履中補官京師以詩文遊
公卿間時畿輔方開營田水利相國朱軾薦其才遂
往任事相度形勢指陳利害百不失一歷吏部文選

司郎中注選肅清遷御史尋掌刑垣有巨商挾厚貴
營銓法堅執不應擢通政司右通政以憂歸

宋吉金字姜銘商邱人任湖廣辰州府通判攝長沙府
事不旬日清積案百餘件有能聲擢授寶慶府知府
有某令被罪以金餽吉金曰吾家世清白豈受污哉
卒祀名宦

王紳字公垂提學僉事震生子睢州人康熙壬戌進士
選庶常改工科給事中敢言事丰采特著時淮泗漲
溢

上命濬海口以安徽按察使董其役河督恐撓已權上言
宜罷其役而別開大河自車邏鎮築橫堤抵高郵自

高郵東築長堤二束內水以入海工雖旋罷而已開
減水六壩於高家堰以洩洪澤湖秋漲後以江蘇巡
撫湯斌之議復命大臣督濬然上流漫注功用不就
詔河督與廷臣面議意多不合以紳言始定議閉減水壩
後奉

命偕諸大臣築高家堰塞諸壩濬清口淮黃安奠得免水
患者數十年又疏請以高堰節省費盡易石堤爲一
勞永逸計

詔許之累官至戶部侍郎

彭溶字若干夏邑人以明經授教諭歷遷戶部江南司
郎中會江蘇巡撫宋犖報沐陽許縣災部議欲發帑

不可或謂其徇鄉情溶曰吾實不忍百萬生靈轉溝
壑也毅然持之卒得賑恤未幾出守都勻以母老乞
歸

劉官冕字華簪夏邑人以明經授濟源縣訓導陞廣東
遂溪知縣縣故貧瘠邊海常苦水患民無所資生流
亡載道冕捐俸周恤并詳請賑濟上官知其廉能令
兼賑海康徐聞二縣冕設法親給民被實惠所活以
萬計卒于官民立祠祀之

高岑字峴亭商邱人由教習出知豐城縣緩積逋以紓
民困尤加意訓士公餘勸課不輟子十人皆讀書知
名於時

劉麟趾字公振商邱人康熙庚戌進士授永安令課最
擢戶部主事歷禮部郎中出知桂林府調慶遠政尚
清簡勸農興學不求赫赫名而所至有惠澤民多尸
祝之以望誤鐫秩歸

楊勳臣字一丹商邱人以從軍議敘授南充令邑多積
盜殲其魁餘盜悉平俗未知學為延師儒崇信讓工
風大振署南部蓬州篆革諸陋弊民勒石志之以母
老告歸

王鎬六字京那柘城人康熙己卯舉人性孝友族叔鏊
為上海令卒於官因缺帑樞不得歸鎬六鬻產得八
百金代為完補授德安知縣剔積弊抑豪強設義田
獎善類及去民為立碑

李裴字希母夏邑人初任和平令有術士奉大道鬼惑
民逮置于法羣迷始悟宋文丞相二女殉節邑境人
罕知者為建祠表章之遷主事以母老不出闢小園
奉養金壇王汝驥名其園曰循陔甫終養浙督薦查
台州民欠繼修海塘敘功陞知平陽府歸田後邑建
普濟堂捐穀千石大府欲上其事固辭乃止又置義
塾施絮衣棺木及賑粥施藥歷五十餘年以子肖筠
官吳臬晉封通議大夫壽終

竇容恂字介子柘城人康熙丙戌進士授中書陞工部
主事遷員外郎出知汾州聽獄平允調徽州修紫陽

續通志卷之五十三
書院集諸生講學仿白鹿洞規爲條約士風大振以
事落職補嘉定府築石壩河渠衛三臺射洪等邑疏
濬樂山石門場湮廢溝渠引水達夾江界灌田數百
頃俾成沃壤後引年歸

李汝霖字雨蒼永城人康熙己丑進士授鄱陽令民多
逋賦霖廉得其真貧瘠者不忍扑責嘗捐貲代償數
百金爲政嚴肅遇恃勢不法狀懲以法不少貸然其
人亦不憾多自新又倣朱子法設義倉民受其利公
餘招諸生至署講論詩文復立書院延師教育之擢
建寧知府改刑部湖廣司郎中致仕歸篤行爲鄉里
最

朱帶金字輔皇商邱人以明經授廬氏教諭擢歸安令
邑有武生朱子巍潛通海寇以太湖爲巢穴帶金帶
民兵直入其室縛之斃杖下患遂息民多逋欠流亡
殆盡帶金鬻家產代償歷四川馬湖知府適烏蒙土
日構兵拒捕帶金隨大軍進勦著偉績後因事鐫秩
歸

彭萼采字棣芳夏邑人貢生授龍門縣知縣調房山事
不留宿民稱無冤旋調三河將去猶爲房民請免息
穀三千七百五十餘戶三河秋蝗入境萼默禱於神
翌日皆抱葉死仕終宜賓縣

劉官統字宇一夏邑人登康熙庚戌武科授河間府守

備累遷陝西副將乙亥征厄魯特以官統為先鋒將
戰軍糧不給官統立馬與部卒約且曰男兒死王事
死有餘榮因整軍前進擒其上將追殺三十里旋聞
給拖沙喇哈番尋陞登州總兵調寧夏入覲奏蓬萊
民隱辭甚惻

詔減賦三分之一寧夏土俗强悍官統至更定部曲為分
合營恩威並著所部帖然又創立義學免山澤及內
外互易之稅邊人待若慈父後陞西安副都統卒於
官

王組字公冕睢州人紳弟以明經授教諭陞元氏知縣
邑逼處大山多積盜組嚴設保甲羣盜斂跡擢寶慶

府同知遷本府知府郡為楚之南服崇山密菁徭民
雜處組摘伏禁奸闔郡寧謐辰沅與寶慶接壤而偏
橋鎮者沅苗之最深阻處也癸未歲

上命三省建節大臣相機勦撫三百餘砦天星砦尤為絕
險至是亦願入版籍為氓共十餘萬家攝臬篆屢決
疑獄大吏倚重具題辰沅道

命未下而卒元氏寶慶各祀名宦子式淳字西銘康熙乙
酉舉人授西寧令地逼番彝淳因風俗順軍民心期
年之間政治蒸蒸調祁陽令擢茶陵知州以廉幹稱
遷漢陽同知保薦入都卒

殷之榮字肖宇商邱人起戎伍滅劉寇有功復平定華

山賊屢遷桂林副將奉使交趾封王論功調浙江水師營副將卒於官妻孫氏遇寇被難子士舉歷官沔陽州同築修吳嶺諸堤民爲立殷公堤碑記其事李識蒙號李舟夏邑貢生授介休知縣以興教化利民生爲先務後補安縣邑民爭水慨田累年不決蒙相其形勢廣開渠道一方均沾其利尋擢漢州知州卒於官

楊輔臣字右扶商邱人少爲名諸生值西邊不靖輔臣應募辦駝馬議敘知縣又輸運西北遷靖州歷知長沙永順諸府久任楚疆悉知風土前後勦捕逆苗身經九戰著勞績城步縣有猺賊攻掠官軍莫敢擾其鋒輔臣曰吾軍賊所畏也吾軍退諸路軍必敗矣下令敢有言退者斬遂親冒矢石督士卒奮勇爭先連戰大破之論功第一遷辰永兵備道復招諭城綏九尚攻克三寨縛逆苗二百餘人西南諸夷由是帖服以終養歸

李惺字存存永城人康熙辛丑進士授錢塘令江干一帶多劫盜抵任後多方弭緝行旅乃安委訊江南大獄釋可矜者三百餘人遷玉環同知陞温州知府調紹興蕺山爲前明劉念臺先生講學處捐資修復延師主講席登科第者甚多親老告歸孝養十九年間安視膳外終歲惟杜門讀書而已起補順慶知府請

訓時自朝至午奏對千言

天恩優渥諸大臣咸嘆為際遇之隆出於常格未赴任即

擢貴州糧驛道甫四月卒

張孚至字子惠夏邑人雍正甲辰進士授建德令邑山

多荒無着銀地數千畝又有九姓船隸建舊征丁鈔

五百餘力請減二項額糧七百有奇有強佔人山場

者為重抑之終養歸邑人鐫石以志子而詠雍正丙

午舉人官陝州學正

張景良字又房夏邑人以明經任四川南川知縣邑地

多荒蕪良至即鳩聚窮民開墾土地數年稱富庶後

補吳橋縣縣舊例徵收凡逃亡槩不除籍

單頭每至傾產良乃立滾單法宿弊悉除士民便之

遷漳河同知漳水漲溢居民常受害良為築堤建壩

水皆就道擢江西南康知府

張岳字嵩如商邱人猿臂善射多智畧年甫踰冠從軍

立戰功授軍官後以遊擊隨征噶爾旦凱旋遷靈州

叅將尋陞西寧總兵軍民懷畏邊夷讐服以疾卒

李敏第字瀛少夏邑人雍正庚戌進士選庶吉士改工

曹擢陝西道御史疏凡十餘上多蒙採納出為淮徐

道擢山東按察使持法平允民賴以脫冤者甚眾遷

本省布政尋調山西三晉財賦重地藩庫收納舊有

添秤滴珠等色目歲可得數萬金羨餘敏第一切裁

革西人稱之陞光祿寺正卿丁艱起補光祿少卿轉太常少卿卒於京貧無以殮親舊賻以金始克歸葬路建翰寧陵人登雍正庚戌武科任涼州守備旋委領兵駐哈密既旋歷署高古鎮番諸營叅將丁內艱歸起服補涼標遊擊調寧夏戊辰會兵勦大金川五月抵黨壩協攻康八達建翰冒矢石為士卒先中重傷卒於軍事平論功一等贈署叅將

賜祭葬恤其家

宋齊馨字元宰商邱人授梧州府同知值苗變人情惶惑齊馨戎服將事奮往爭先刻期平定署梧州府捐資葺書院置義田收梧廩稅務革除宿弊調慶遠同

知

宋鎰字右宜商邱人授教諭陞壽陽知縣地瘠民貧苦於丁役鎰多方撫綏民困以甦遷建寧府同知臺灣之役著有勞績以疾致仕

彭直枋字習之夏邑人雍正乙卯舉人授雲南知縣地當迤西安南之衝多巨盜枋密偵嚴遏盜乃止後改補貴州天柱令歲輸兵餉疲於陸運乃相地開鑿改由水路公私便之

王縉字公符戶部侍郎紳弟以諸生膺保舉授東明知縣邑多盜訪渠魁一人為總練保長誠之曰有盜即斃汝盜遂絕跡丁艱服闋補獲鹿令累陞戶部郎中

擢蘇松糧道釐剔積弊懲收冒濫遷江蘇按察使訟獄多所平反尋病告歸癸未歲

聖祖南巡繻力疾迎覲

賜藥賜詩

諭以調攝

賜世恩堂匾額子沛聞澄慧沛聞字鏡津以明經授教諭

遷博興知縣累擢桂林知府有政聲

王澄慧字勇循康熙癸未進士授戶部主事擢員外郎

戊子科典試江西拔李紱等數十人遷刑部郎中以

父病歸服闋補刑曹出知肇慶府擢蘇松道缺係復

設胥吏皆新置無成案可稽慧極力釐剔立為章程

巡鹽務營兵獲私販多誣以拒捕瘐死者各屬月報

數十人慧請於大府奏加兵備銜提訊鹽犯營卒乃

不敢妄誣凡牽連者盡釋之崇明兩次民間奉檄安

撫即時寧帖壬子歲海水溢瀕海被災者數十萬戶

慧立義塚瘞暴骨設廠賑濟復置藥局療病者全活

甚眾以母老終養歸

王式毅字誨存睢州人康熙戊辰進士授中書遷禮部

主事擢員外郎釐剔學政積弊著有聲聞陞兵部車

駕司郎中時朔漠軍興議者以馬少欲遠調諸路驛

馬充之式毅謂此議一出諸路騷動因極陳其弊事

遂寢尋視學江右知名之士盡入蒐羅事竣會父紳

督修高家堰工請於

朝以式穀同往三年著有勞績補福建延建邵道閩人頌之

許容字涵齋虞城人辛卯舉人授陝西府谷令屬西陲用兵奉檄監運苦水臺寢食沙漠中與役夫同瘁臺水故鹽鹵乃出貲轉汲二百里外徒役無染患者隨大軍入藏五載擘畫井井悉中機宜凱旋遷部郎尋擢御史疏論近畿官吏倚勢作姦者數人寘諸法遷口北道再移陝西糧道晉陝臬陞浙江布政使丁內艱奪情起爲甘肅巡撫所辦軍需數百萬無絲毫累民後以事繫廷尉獄旣得白

特命爲晉藩陞江蘇巡撫以外艱去職服未闋起爲湖南巡撫時苗民蠢動

上諭以墨經從軍之義旣抵任措餉練兵如撫甘時然終以剛嚴見忌落職乾隆庚午

駕幸中州溫語慰問補內閣學士以疾辭踰年而卒

宋筠字蘭揮商邱人康熙己丑進士授編修改兵科給事中轉戶科掌印給事巡察山西多所條陳旋授山西按察使決獄無漏網亦無冤滯陞通政司右通政督理江南高家堰石工疏濬修築嘗於暑雨泥淖中督催不倦工竣繪圖以進署安徽布政使改江西布政大庾信豐崇仁永豐等縣被災具摺入告得加賑

卹全活者無算尋陞奉天府尹地處富饒穀賤妨農因奏請變通糶賣並撥養廉以專職守清驛站以免墊累俱見施行後以疾請假歸

田遜字牧臣睢州人雍正癸丑武進士以待衛任四川重慶遊擊乾隆十年討瞻對深入不毛直達擦馬隘口焚賊寨又攻擦牙所中山梁大破之復攻中路下密索籠佈機等處抵章谷奮勇爭先連燒碉寨九座奏捷陞建昌營參將訓練調劑得宜兵弁誦德十六年換藏藏蠻鬪很輕生搦切激變者屢次遜至乃鎮定後陞江西袁臨協副將卒于官

彰德府

李如桐字桐封安陽舉人順治初授黔令後補宜君邑兵燹後城郭官署並殘燬如桐僦居石堡與民雜處近境土寇出沒單騎往諭多攝服解散時民力凋敝不能供額賦力請奏減又繕城垣修學宮次第舉行擢興屯同知母老乞終養

劉肅之字欽中安陽舉人順治初授嘉善令再補漢川陞西安同知司權潼關時潼關衛屯糧兌食逋舛數十年案牘莫稽遺累死者數十人尚多縲繫肅之盡讞釋之擢刑部員外出知温州府邏卒以捕魚者百人誣爲盜白其帥將盡戮之肅之力爭曰海民失業內徙宜恤以法誅之温其無民矣請縱捕魚者卽有

事守身任之後以降調歸

蘇宏祖字恪甫湯陰人順治丙戌進士知和順縣會姜瓖叛連陷汾潞蒲絳數十城復陷遼州兵逼和順衆心皇皇宏祖乃召父老拔刀自誓申明大義民心始定復訓厲鄉勇出賊不意擒賊首王歌連獲僞官城賴以全後禦五臺賊劉永忠亦如之以勞瘁卒於官貧不能歸民衆爭賙而歸之

吳之鏞字穎修安陽人順治己丑進士知丹陽縣立社學賑飢民修練湖塘以溉田三舉卓異以前令積逋呈誤民立臺祀之後事白補南皮令又因前令事謫安邑丞時霖雨衝堰決鹽池鏞率數萬人夫塞治之攝縣事減免遼餉二千餘兩

張潛字尚若彰德人順治壬辰進士改庶吉士以母病乞歸偕妻劉氏割股以進母病得愈性方嚴家居二十年足不至公庭卒祀鄉賢

王槐一字植初彰德人順治丁酉舉人知浮山縣浮山丁糧十年例一辦公務費踰正額又商人高鹽價和以沙土民多坐私鹽論罪槐一胥釐正之有訐訟者立剖曲直胥役終歲不出縣門蒞任五年以老歸浮山人至今頌遺愛焉

李天敘安陽人以拔貢授洋縣令時吳三桂駐漢中招買繁重民不堪命天敘不避利害痛哭立爭闔郡均

得豁減以父憂去洋民立碑頌之

白芬字猗若武安舉人授嘉興府通判攝嘉善海鹽兩
邑篆撫流移勤守禦民漸安業逆魁熊二肆掠大兵
屢勦不克芬以計擒立斃之嘗請均白糧浙省通行
之民以為便累官戶部員外郎清慎自矢終始一節
為時所稱

單繼字緒夫武安舉人授唐山令在任九年廉慎自矢
不名一錢以鑄級歸居村舍澹泊自甘及卒家無儋
石善古文辭工書法

李特生字仙滋武安舉人授崇陽令崇于楚為劇邑既
下車一以清靜寧民為本他如均徭役絕私派革奸

晉載投誠治績尤著以母老告歸

徐誠身字豫菴武安人康熙己丑進士授蒙城令建山
桑書院以課士又濬渠溉田邑人號為徐公渠兩校
鄉閭所得多名宿

楊問奇字載公內黃舉人任新野令歷遷慶陽知府至
陝西肅州兵備副使所在有賢聲任新野時識彭而
述於未第號知人性孝友歸田後盡出官囊與兄弟
均分之鄰里有窮無歸者終贍養率以為常

黃本訥字漢型內黃人康熙丙辰進士授太原令廉介
多惠政遇事有擔任凡不便於民雖忤上官意弗恤
也以告歸百姓乞留不獲送者數百里絡繹不絕

陳又良字北學安陽人康熙丁丑進士授婁縣令居八載潔白自勵有富豪殺人暮夜持多金丐脫罪又良堅不為動卒寘之法坐漕務解職囊無餘金羈棲二十餘年民感其惠各執薪米以供朝夕

衛輝府


蘇文樞字寰中時澤子汲縣人順治丙戌進士授行人擢給事中疏陳衛源驛站歇馬三大事又上刑賞未當疏獲罪旋里

蘇帽字襄月汲縣人順治戊戌進士授廣東三水知縣剔弊興廢屢著異績遷荊州府同知履堤工理屯政申飭郵傳三年荆人歌之推雲南武定府知府以憂

歸祀三水名宦

周嗣昌字顯承新鄉人順治乙未進士授鄒縣令巡方稱其能時察荒使以邱法丈荒圖說日數下頭緒紛拏有司罔知所措嗣昌為指陳利弊得以無擾復詳陳驛傳七難後罷官民為立祠

王進滑縣人驍勇善戰順治二年隨大兵下江南取浙閩以功授副將防守邊海嘗與賊戰中烏鎗兩臂鐵子纍纍隱肉內後以事下獄十三年海寇犯福建大吏命進出獄禦之復出追勦焚其舟事平敘功授遊擊尋聖吏議康熙十三年耿進忠將謀亂總督范承謨陰為之備招進至閩甫三日即遇變退授偽職然



進忠亦疑之不用十五年大兵進勦進與張端午等謀爲內應事洩被害

魏慶雲字飛公滑縣人順治己亥進士授福建政和令邑處萬山亂後逃亡殆盡慶雲悉心撫字民乃復業東常市人楊旭明等以事忤前令令坐以抗糧罪株連百餘人慶雲白其寃後以積勞卒於官祀名宦郭獻吉字右之獲嘉人任山東青州府通判當廢宗宅地起解東人內株連數百人設法開釋甚衆署樂安縣有德政及去百姓遮道送之性坦直遇人無親疎一以誠類

趙永言字禹聞滑縣人官光州州判甫至歲稔出積穀以活飢民光界楚會有兵變州牧病不治事永言親率健丁晝夜巡邏城中有反側者先事弭之不得發復張虛聲疑賊賊竟不敢犯由是境內帖然方聞變之初以劍授其妻曰吾家世忠義賊至母受辱倅光丁三年以母憂歸

李璘字俞左汲縣人以父實發殉難蔭授金壇知縣紳士某婦有殊色狹邪子聚羣少聖面持械人劫因汚焉紳訴於縣璘知爲勢要子弟戒勿洩數日後設飲招集內署舉觴屬曰今日通家敘舊行有公事須質言色甚厲衆駭愕因立擒下獄按具服當道多爲營救璘執法不撓卒駢斬無遺遠近稱快

景考祥字履齋汲縣人康熙癸巳進士由翰林改御史
出巡臺灣轉吏科給事奏革鹽引官運官賣之弊旋
管福建都轉鹽運司事以屯積羨餘數十萬劾悉散
新商創立章程垂爲定制罷官後生計蕭然晏如也
著有臺灣紀畧

暢于熊字光羣新鄉人雍正甲辰進士授黃岡令兩代
黃州郡篆疑獄多所平反有麻城涂氏婦私逃其父
誣婚致死滅跡羅織無辜七載不結于熊微服廉訪
獲婦而釋其婿人誦神明卒於官

懷慶府

吳國用字公輔溫縣人順治戊戌進士任衛輝教授遷

永豐令永豐黃冊舛錯田土多爲豪強隱蔽賦役偏
重國用廉得其狀履畝清核平其徭賦積困以甦縣
與閩境接歲荒閩人流入境者國用調粟拯救安集
得所南鄙嘗不戒於火風勢甚熾國用徒跣拜祝反
風火熄邑民比之江陵劉尹云

孟文升字重華原武人由明經授直隸束鹿令邑豪藏
匿亡命爲不法竄名軍府資緣官都司歸里後與其
子端石爲不法文升廉得其狀立斃之乃率吏卒檢
其家諸亡命皆倉猝不及備搜獲民婦女十餘人釋
之鹿人歡呼載道爲立生祠尸祝之

姬大訓字陳西原武人以明經授教諭陞湖南沅江知

縣沅經吳逆蹂躪百政廢墜甫下車訪民疾苦多方
撫綏康熙五十八年湖撫以題請復額事檄縣履畝
清丈沅尚缺額地八百餘頃大訓曰蕞爾邑流亡甫
集可以重賦相累乎具狀請減屢請乃報允由是照
例請減者十五邑

鄒珩字石玉河內人順治己亥進士歷仕臨洮郡丞監
河州軍時番人窺

國家用兵巴蜀突圍河州珩單騎至番營數其三罪立解
去

蔡魁春字元之河內人由選貢仕五臺令以均里甲繕
城守爲先猝有寇警薄城下春乘其無備出兵攻破
之寇悉遁去卒祀鄉賢

衛哲治濟源人拔貢授贛榆令免魚稅禁科派改折漕
米以免海運弛青口海禁以通商賈歷淮安知府會
陳家浦工決載數百艘親涉洪濤中所救活者無算
遷廬鳳道歷安徽廣西巡撫陞工部尚書

續河南通志卷之五十五終

續河南通志

卷之五十五

人物志

列傳

七

懷慶府

續河南通志卷之五十六

人物志

列傳三

河南府

董琪字章含嵩縣人順治元年以貢生授確山教諭陞
 壽昌令時當初定弁兵恣肆民閉門罷市琪力請按
 律究懲又平貧富徭役者著為定籍境內以安海寇
 壓壽境三衢震動琪乃請兵勦捕躬親運籌浙右倚
 重擢德安同知以終養歸

杜之璧河南人順治初任處州推官廉約恬靜案無煩
 牘有刑措之風

蕭應聘洛陽人崇禎間舉人順治時除阜城令擢部曹
出知臨江府晉驛鹽道豫省漕糧故事徵銀買米起
運後因兵餉改折康熙二十一年京儲不敷仍令各
省運米越境採辦民甚苦之應聘力陳其害豫撫王
日藻據情疏請竟從改折之議今會城學宮旁刻石
記其事

王雉昂字太羹孟津人由舉人任薊州牧陞保定司馬
時容城有叛者部院議督兵勦捕雉昂曰此飢民也
何忍加兵迺獨往上官危之比至衆皆羅拜大呼王
佛爺遂招安擢戶部員外尋致仕卒年八十三

傅景星字夢正登封人進士授潞安推官以廉慎稱調
繁平陽考最擢侍御多彈劾直聲大振巡按順天尋
掌印臺中累官至少司空在官多所條奏其陳河工
利弊尤稱碩畫致仕歸家居二十餘年讀書甘淡泊
鄉里咸推重之

陳績顯字無績孟津人官川南道時版圖初定招徠勸
墾修城建學除荒糧免水手四州十一縣皆勒石志
感

張忠孝字雙全洛陽人以軍功累官福漳副將調辰州
平紅苗亂連克十餘峒寨會楚兵裁餉糧噪變陷武
漢黃德諸郡忠孝兼程進發窺賊營未定薄柵下援
桴而入斬賊千餘復搗賊壘後以功授湖廣總兵官

王鑑字子陶孟津人初爲鹿城令遷西曹出秉山左文
衡所至著異績卒祀鄉賢鑑好學亦有所撰述稿多
散佚書

傅性良字元赤登封人順治初由貢生知永壽縣賊賀
珍圍城性良堅守獲全總督孟喬芳上其功陞蘇州
同知濬河修堰開三吳水利攝長洲嘉定縣事多異
政尋致仕卒祀鄉賢

李克繩字正則嵩縣人舉人授太原府推官有墨吏事
發行賂求免却之卒抵法平陽庠生趙悅被誣坐抵
克繩爲平反臬司胥役殃民事發按治不稍假卒於
官

憲正色立朝屢上封事皆關民生利弊時論譴之

張彥珩字九如洛陽人順治丙戌進士由戶部分司歷
興化知府尋由按察晉楚藩有冰蘖聲

范芝字雲根洛陽人任南樂安肅兩縣革去里弊陞刑
部主事轉郎中平反協中無冤民擢莊浪道按察司
僉事尋致政歸

李滋發洛陽人順治五年授旌德令時徽寧土賊爲亂
鄉民郭二導賊入旌焚掠村落官兵合書吏誣良求
賂爲害尤劇滋發悉其弊選練長數十人編皂丁屬
之聽其指麾以備緩急賊至親驅練長擒捕逾年殆

盡

王用六字六符孟津人博雅好學以副貢任阜平令邑
殘毀招徠有法尋改丹陽丹陽故逋賦直指按治之
士民危懼用六悉報完無一人罹法衆感泣爭輸不
三日而帑足作孔邇吟傳其事先是海寇入京口遺
榜署降丹陽民亦有株連者用六力爲昭雪民立祠
祀之年八十卒

董鐸嵩縣人順治戊子鄉薦除開化令蒞任值大饑鐸
申請發廩賑濟猶以限於定額乃遣人歸取家資以
千金益之民感其德建生祠

楊國樞字垣斗順治六年由拔貢除泉州府

劇寇數十人出騷驛遠近患之樞以計擒獲覆其巢
再補處州通判會丁內艱歸

蘭挺達字金芝偃師人順治己丑進士授行人遷刑科
給事中以民命攸關有讞獄不宜久留之疏陞吏科
右給事中會浙撫陳應泰劾錢塘令丞等部議革職
應泰復婉轉乞還職按臣牟雲龍亦傳會奏請挺達
以其前後異辭抗疏論之語多切直又因仕途壅滯
有清銓政以作人才等疏累遷吏科掌印都給事中
借河南道知選事管理京察大計矢公矢慎尋以疾
致仕卒

孫養翼字九萬孟津人順治己丑進士由刑部郎陞四

川川北道值獻賊初靖遺黎猶匿山谷問養翼招徠
安集歸而受廛者億萬戶轉湖廣上荆南道督解
皇木力請水運全楚賴之所在建生祠崇祀名宦

張杞字樸公偃師人順治戊戌進士任鄖縣令兵燹後
撫循瘡痍民漸復業時餘孽乘機竊發會駐防提鎮
卸事兵失統民氣沮喪杞急走馬號城中曰死生命
也忠孝性也正吾輩致命之日諸百姓勿避難棄義
民情安堵未幾大兵進發數萬屯鄖芻茭糗糧供給
旁午無不立辦而邑事亦不致廢弛漸報凱以軍功
陞永寧牧尋致政歸

裴養元字九章新安人順治己亥進士初任栗陽令邑
多豪棍下車治尤橫者數人境內肅然水旱三載餓
莩充路力請免額稅十之三復 粥賑濟全活以數
萬計士民思之祀名宦祠行取兵部主事終武選司
員外郎

董謙吉字去競澠池人順治己亥進士性慷慨明決任
新淦令捐荒糧補舊逋民感其德立祠祀之

楊鑣河南舉人康熙八年任麟遊令有應變才滇黔之
亂凡輓運重役極力擔荷爲民籲免岵山賊嘯聚檄
到縣鑣卽夕定謀率鄉兵殲之陞遼陽知州

王無忝字夙夜孟津人康熙庚戌進士由行人歷西曹
讞獄多平反遷駕部值楚寇猖獗徵調動協機宜寇

平大司馬欲上其勲無忝曰此臣職也司馬歛容謝
守金華爲七國咽喉地耿變甫定城郭榛蕪初下車
招徠安集與民更始以勞卒于官崇祀名宦

王無荒字曙靈孟津人父匡巒守太平以勤勞卒無荒
初任龍游令值耿變捐貲佐餉民不擾前官有以賦
額不足責他戶代償者無荒悉請清還百姓感之爲
立祠以祀尋改授川之碁江蜀道故險逆氛未靖日
以保境息民爲事寢食不遑疾遂劇卒于官

屈必達字鳳山嵩縣人康熙壬子舉人除廣東四會令
邑濱海多盜必達爲團結鄉社擇要害設汛防賊不
得入民乃安邑之友都多虛田實稅民苦追呼必達
力請于上漸次豁除擢刑部主事旋補兵部職方致
仕歸子冠廩生官漳浦丞博覽多通位不副才時論
惜之

金式字兩如宜陽人康熙戊午舉人授福建松溪令水
災後人民逃徙者田俱入官名曰官田式至給復原
主民歸業者日多減耗寬徭善政尤著行取擢補主
事卒

袁拱字紫辰洛陽人康熙壬戌進士選庶常歷官廣西
右江僉事時逆藩甫平各省猶苦徵餉拱悉協機宜
凡所指陳樞省皆取決焉洛陽貯穀舊議極多拱洞
悉其難陳於當事減十之九至今出陳有節而買不

病民子昌齡癸卯舉人孫句乙丑進士

于履雲字素公孟津人初任鄖陽通判繼補青州清查
樂安日照逋欠以甦民困請豁顏神鎮鎗手以除永
害及從事楚泉攝篆漢陽一以盡職愛民為主解組
歸囊無十金

張度正字萬準偃師人康熙丁卯鄉薦從耿介受理學
要旨介沒度正主嵩陽書院以冉觀祖天理主敬圖
授學者除祥符教諭做實克勤教泌陽法立會講論
以敦倫修行為主尋致仕

魏灝字標野孟津人拔貢生任杭州水利通判性簡朴
取與不苟整躬率屬急國課恤旗丁攝新城篆部藁

夜之金浙人德之祀名宦

喬廷謨字祇承偃師人弱冠從耿介學讀書能體認務
期實踐嘗謁湯斌於京師斌器重之以拔貢任商水
教諭與諸生研究心性勉之以躬行不專事文藝尋
陞教授致仕卒年八十著有讀中庸錄西銘解思誠
語類

景日珍字東暘登封人康熙戊辰進士始令高要邑舊
有水怪每乘風雨作洪濤為民害嘗夜坐吏以水患
驚告日珍服朝服奔立岸上誓以身殉水輒退高要
民即於立處建生祠行取為侍御以憂歸服闋補原
官多所建白累遷少宗伯加尚書凡典制多所更定

尋致仕

呂兆琳號叔玉新安人順治辛丑進士任西鄉令招集流亡悉心撫綏尋擢福建道御史巡視倉場剔釐積弊朝士躋之

王湖維字林熾嵩縣人康熙庚辰進士授潞城令歷青浦崑山二邑賦繁甲天下吏緣爲奸湖維治得其要頗清積弊以帶徵舊欠不起落職總督奏留知太倉州累擢嘉湖道委查松江積欠事竣晉布政使叅政分巡寧紹台道卒于官

張星煜字紫凝嵩縣人博涉經史康熙戊子舉鄉薦屢上公車不第乃潛心理窟以講學傳經爲己任授裕州學正課士先德行後主大梁書院講席從遊百餘人著有四書會要

呂謙恒字澗樵新安人康熙己丑進士由翰林改御史轉給事中巡城會南郊奏以雜草徵役胥吏因緣病民又夏秋之交洞庭瀧濤壯猛湖南士赴鄉試苦遭覆溺宜分設棘闈

詔允所請遷鴻臚大理至光祿寺卿所歷必張其職致仕歸與兄履恒俱以文學著名

王籌字仙根孟津人康熙乙未進士授寧遠令裁免科歛雜稅等弊寧故少甲乙科籌作養士類後登第者繼起

張蔭圻字采臣嵩縣人雍正癸卯進士授戶部主事出
爲奉賢令復署郟城益都諸縣所至著績而益都民
尤尸祝之補高苑縣令小清河水爲民患築堤捍衛
奉派旱工八十里水工三十里期年告竣而民不擾
邪教事發檄提高苑民七十餘家蔭圻悉其寃力爲
申理全活甚衆尋致仕

傅百揆字時敘嵩縣人雍正甲辰進士知雲夢縣邑瀕
江漢苦泛濫百揆奉檄修堤乃相度形勢作漢水說
修堤總論疏濬廢堤議桁杆礮石記十餘篇期年堤
成作堤工賦尋病歸

李學裕字餘三洛陽人雍正丁未進士由翰林改御史
巡察直隸廣順大三府官吏凜凜雖大府亦嚴憚焉
轉兵科給事策封安南授刑科掌印給事中轉四川
建昌道自打箭鑪至西藏民獠威懷治行甲兩川金
川諸土司相仇殺學裕會諸將巡視開諭皆駢首革
心調江蘇糧道會淮揚水災制撫委學裕拯濟起瘠
甦困數百萬人遷按察使明允無留獄擢安徽藩司
卒于官

郭世奇字霞標洛陽人乾隆丁巳恩科進士任廣東吳
川令前官遺案累百世奇以十日審結嘗簡從下鄉
鎮集長幼教誨之曰使其畏吾法不敢犯毋使其犯
吾法不能逃也越三年無犯徒以上罪者署化州牧



亦有聲卒于官

南陽府

馬驊字赤霑南陽人順治辛丑知建昌縣積逋幾二十萬驊蒞任後以兩遭旱災詳免十萬有餘民沾實惠又地連武寧興國山深而險時上寇餘孽未靖嘯聚劫掠驊偵實密詳總督張朝麟協同遊擊吳鎮進剿獲賊首張跑子等闕五月賊平以艱解任邑人追思德政爲鐫石祀名宦卒年八十

張所志內鄉庠生順治二年餘孽王二等據竹溪房縣作亂民不安業所志奉令身入賊穴諭以大義招安上官上其功署知鄖縣任事期年盜息民安授南漳令有能聲以母老乞歸

韓應琦字紹公唐縣人順治初督兵征南康等地賊據險負固應琦以計平之授南安總鎮綏靖楚粵順治五年江右復叛應琦奮不顧家率所部兵會將軍譚協力勦平妻孥盡罹賊難進資政大夫賜二等阿達哈哈番世券康熙三年出授延綏掛印總兵加封光祿大夫時邊墻久圯難于守禦應琦立烽燧謹斥堠壁壘以固又以誠信結邊人衆皆悅服爲建祠祀之唐邑亦有祠

張琢璽鄧州人康熙十六年知膠州有積蠹盤踞官衙爲民害歷任官莫知其奸琢璽初蒞任以私縱奸僧

斃之獄中州人稱快後以事降調囊空如洗士民無貧富爭投贈之去之日攀轅數十里

徐鴻達字天翔鄧州人康熙甲戌進士授任縣知縣甫至詳免各稅銀大興學校獎進士類歲飢捐俸煮粥全活甚衆州有湖數百頃建壩蓄洩成良田民甚賴之所著有四書銓釋直解行於世

王郡字建侯本乾州人入籍唐縣以戎行官延平千總康熙辛丑朱一貴叛臺沿海震動郡力請從征以奇兵入淡水生擒逆黨李慶會合大兵進勦臺地悉平不逾年遷至南贛總兵旋調臺灣三年值內調方東裝北番構亂郡請留臺彈壓奸民吳福生乘機弄兵郡親率一旅擐甲臨陣賊相顧錯愕曰王公未去我輩何爲郡標下皆勁旅以一當百遂陣斬吳福生撲滅餘黨又督師勦北番悉平之擢授水師提督因老乞休以太子少保致仕在籍食俸卒

賜祭葬謚勤懇

黃鉦字紫峰鄧州人雍正七年以拔貢任安吉州州判值天目山水暴漲鉦捐俸率民夫搶築堅固有訟連年不解鉦片言立剖知蕭山縣案牘悉清建筆花書院歲旱查辦災賑心力俱瘁卒于官

周明德南陽諸生子遐齡爲滎河臨晉永濟三邑宰迎明德至署嘗微服間行縣中求民疾苦歸卽語其子

使除之有民利則使興道之故於三邑皆有施被而
及永濟者尤多邑向號難治至是安然永濟人感之
最深及卒官舍弔哭者千人喪歸南陽不遠千里群
往爲立碑墓上

汝寧府

孔門奇字君平汝陽舉人順治初授廣西貴縣令縣民
苗錯處南山苗羣金寧尤桀驁屢服屢叛兵道以計
獲其妻子繫獄將請大兵勦之適門奇至潯州知其
事謁太守請曰苗民當以德懷不當以威服聞金寧
妻子在獄可釋之某嘗明大義以服其心否則大兵
一至百姓滋累守從其言門奇更資以衣糧遣之到

任旬日率十餘人入其峒金寧陳兵以待其子識之
曰此釋我母子孔公也率妻子羅拜曰苗人不復反
矣後以事罷官金寧饋千金不受遂立祠祀之

劉士蘭字奎瞻羅山人順治丙戌進士任肥城令擢刑
部主事歷員外郎中治獄多所平反出守東昌府東
郡素苦逃人之累每一株連輒亡身破產士蘭嚴行
捕緝得逃人三百餘陞陝西驛傳道歷左右通政皆
有異政以年老致仕卒祀鄉賢

劉亮工字熙載確山人孝子鵬元孫官高州海防同知
署府篆有總兵妾父恃勢害民甚苦之亮工廉得
其實斃之于獄民鼓舞稱快又巨盜劫殺人獄已具


以千金賄亮工卻不受竟執法

孔邁字陶種汝陽人順治乙未進士授慶都令行取除
禮部主事累擢郎中出守金華府俗好訟一詞牽引
數十人邁廉知其弊凡誣告者反坐不少貸期年訟
簡尋罷官

張沐字仲誠上蔡人順治戊戌進士除內黃令自正供
外裁革羨耗壹意與民休息民甚德之又為四川資
縣令治資悉如治內黃一載歸真峯與孫奇逢講學
屢主講席四方受學者甚眾著有五經疏圖書秘典
學道六書學者稱為上蔡先生

桂泓字元旭汝陽人官海豐令邑素富庶凡官署日用
皆里下供給泓曰食君之祿復股民之財不可更曰
舊例也泓曰例非朝廷法度自我變之不亦可乎悉
除之海商毛奇有海船十餘貿易海上其仇人誣以
通倭奇願餽萬金于泓泓不受竟白其寃奇甚德之
為立生祠後卒無餘貲妻子以士民資之得歸里
徐覲階字六平羅山人好讀書下帷深山梵宇中寒暑
不輟尤重義樂施於族子中之賢而貧者授之詩書
資以田產值歲歉賑活甚眾康熙癸酉薦於鄉授范
縣知縣凡所興除皆中利害范民德之子鼎中庚子
鄉試

陳州府



束存敬字心一項城人順治己丑進士選廣平司李清
理案牘決斷如流刑獄多平反著有祥刑錄諸臺交
薦擢吏部主事仲子紳選中翰擢揚州同知

趙大生字子復項城人除瀛郡丞瀛俗獷悍荏符時警
大生擒撫有方以馮溥薦擢慶陽知府

張鳳翮字翔伯西華人順治壬辰進士任興寧令值歲
饑流離載道翮捐俸賑之性敏給簿書積案手批口
畫立辨人目為王元規以薦擢鎮江府同知未赴任
卒興寧人建祠畫像尸祝之

辛永和字柳聖淮寧人順治丁酉舉於鄉授鄒平令聽
訟明決豪強斂迹革重耗吏不能為奸以疾歸里兩

舉鄉飲大賓年八十四卒

于嗣昌字文侯項城人以父蔭授奉天治中宦家子
人昌廉得其狀寘于法累遷浙江按察司有巨惡以
邪術致婦女昌下車即擒之斃于獄中尋陞山東布
政未及任卒

王雲明字漢章西華舉人授黃安知縣邑舊有米運水
費數百金郡守檄之雲明報曰黃安環眾山不由水
運安用水費即揭榜通衢悉免之以是忤郡守意罷
官歸之日士民攀轅號泣五日後始出城

杜之昂字叔抑扶溝人登順治丁酉賢書仕平順知縣
邑有豹為民害昂為文禱山神是夜豹死行取晉御

史疏請康節邵子與周程張朱並接道統其後裔亦應並授博士從之卒於任

萬如濟字禹瀚陳州人康熙己丑進士知開原縣開故邊徼地瘠民貧逋賦坐累不下千百家如濟力爲詳請得免其所興革務合人情陞戶部主事未蒞任卒于官

朱晷字斗瞻陳州人任教諭陞知繁昌擢蒲州知州有惠政歸卒蒲民數百人來陳哭于墓子鴻緒字森菴由貢生官至霸昌道歷任煩劇所在多異政

蘇名卿字价藩陳州人以武舉守備潼關辛丑歲大歉大興等寨民欲逃名卿留之而倉廩空虛乃解囊按戶口給兩月糧民始安籍丁酉閩邑民變調兵勦捕民扶老攜幼叩關籲救本道恐有不測閉不納名卿力請開關安置按戶給糧閩邑平乃令歸籍治潼衛十八年有政聲

孔興唐太康人康熙丙子舉于鄉授寧鄉令到任五日卽倡捐數百金修文廟半載告成寧邑屢遭大荒民流亡額糧多積欠興唐以俸銀千餘代完境內有虎患齋戒告神民始獲安

段舒字仁九太康人康熙丁丑進士任潛山令前任有盜案誣陷王小等七人舒訪獲真寃獄以白設義學甄拔單寒潛邑數被災請賑請加復借貸煮粥全

活無算士民有悅來集誦之尋以行取離任卒

孫常字大年陳州人父式博學著六息齋詩草常康熙

庚辰進士除棗陽令地近山谷盜賊竊發常廉得其

實悉置重法擢文選司主事累遷永昌府所屬土司

傾心向化卒于官

李進德字翰如淮寧人任福山令遷廣信同知值上饒

十三都民變臺憲將發兵勦捕進德以數騎入諭服

之擢潞安守尋罷歸子綰邵武同知緡亦出仕

郭維墉字升菴太康人康熙癸巳舉人授桂平縣知縣

時捕獲有罪者多牽誣墉鞫訊核實多所全活調上

林獐猺雜處每遇差胥役多索擾墉度地遠近限以

時日獐民稱便

盧愈奇字滋大扶溝人康熙戊戌進士以知州銜借補

本涼府通判整飭鹽政夙弊一清補涇州知州俗以

抗糧為能事愈奇設法勸諭不事敲扑民爭輸納時

西陲用兵軍需迭興愈奇辦運三年不悞公不擾民

治行推秦中第一以不附上官幾至罹禍


王光奭字檢齋西華人以選貢授渭源知縣治行第一

歷刑戶郎曹以廉幹名兩讞江南大獄擢天津道

杜俊彥扶溝人授臨賀知縣縣獐獍雜處俊彥多方化

導頑俗頓革會富川獐變粵督進勦檄濟夫役火藥

俊彥咄嗟立辦民不為病邑有偽鎮投誠數年督師



疑其詐欲因富川兵勦之民驚恐散匿俊彥星夜移
文止重兵身爲綏定僞鎮感泣民安堵及卒賀人爲
立祠

杜俊章字芝圃扶溝舉人任扶風知縣以維持風俗爲
先嘗有兄弟成訟者輒撫躬自責曰教化未及遂致
鬪墻司牧者之過也訟者悔和好如初

金士淳字淑子西華人秉鐸泌陽遷聊城令邑故貧瘡
一歲中旱蝗水三告力請於上議格不行深自憤懣
乃以車載災狀訴詞三千餘紙泣請上官僅免徭賦
什一破產賑貸憂勞病瘠歲餘卒士民哀感立祠祀
之

孟調淮寧人以拔貢簡發山東歷招遠安邱鄒平三縣
招遠俗悍多鬪爭調化以禮讓民俗一變安邱有張
氏子夜被殺不得主名鄰里多惴惴調當場勘問得
正克民頌其神後以兩弟歿奉親無人謝病歸養撫
姪國彥國禧如子先後登賢書

柳國勳字世臣太康人以恩蔭除襄垣令屢決疑獄有
能聲累官鹽驛道歷任多善政商民立祠祀之雍正
元年晉江西按察使以事罷

高培字仲益陳州人初知建安縣有德政累陞鎮沅知
府府乃新設民獮雜處培加意撫綏雍正十年獮變
衆惶懼培曰守死殉難吾分也爾輩任所便衆感泣

誓以死守猷聞有備而退

喬履信字實夫商水人雍正庚戌進士任富平令捐俸
建南湖書院置田百餘畝士風丕振詳豁孫姜里衝
決田懸額革大里長承辦科歛金邑民戴之調咸寧
咸寧出借向皆鋪戶領納里民貼賂自履信辦理後
奸弊一清尋以薦候考御史會丁內艱歸服闋補禮
部主事候補御史未幾卒

萬方極扶溝人雍正癸丑進士授青浦知縣有朱家角
為邑巨鎮奸民聚集阻截商舟方極赴鎮諭之眾始
散去既而督撫有請勦之議方極抗言宜捕其首者
餘悉寬免全活者甚眾


許州

吳梁字柱國許州人領康熙壬子鄉薦除福建永定令
金鋒里民數叛梁親至其巢穴諭以恩威眾咸帖服
大吏聞於

朝陞戶部主事歷員外郎中擢御史累官至宗人府府丞
歸里卒於家子寶琳瑤琳俱登賢書孫煥廕中書舍
人

袁皞字際熙許州人康熙丙戌進士潛心理學為睢州
教授啟迪後進文行兼勗後遷浙江仁和令

潘執中字允恭臨潁舉人任汝州學正性坦易勤訓課
時土寇為害中與州牧登城守禦賊眾至城下望見



之謂其衆曰潘公好人不可犯遂引去

侯瑜字維生襄城人進士授石城令時鹽販收發向多高下瑜悉平之并汰水脚幫造浮費他如增葺學舍捍患息災尤多美政卒於官石民建祠以祀

張衷恪字惕若長葛人進士授竹山令俗尚潭神愚民事之甚謹恪灼知淫祀集木主盡拔於河外艱服闋補雲夢值歲饑殫心經畫民免枵腹築堤疏河修學育士教養備至卒於官

劉青芝字芳草襄城人雍正丁未進士授翰林院庶吉士髫齡通經有神童之目績學晚遇公卿屬日將大用會兄蓮踏雪走二千里相尋入門相向哭賦詩曰

今朝不盡團園樂那有來生未了因芝即日請假與兄策蹇歸故交官豫者造廬諮地方利弊芝語不及私惟襄城舊例運漕河北往返千里間閭苦之芝言於大吏得三百里內照運本色餘俱折銀大河以南解輸輓之困青芝至性過人篤于倫類既與兄俱歸兄旋病疽卧牀二年藥物起居周旋左右無倦容姊嫁夫死貧無所依青芝應養于家姊死合葬于其夫之墓時人以為難而青芝以為固然時同里耿塚字錫公歲貢生授訓導亦以學行聞襄城言篤行者交推焉

陝州

杜桂盧氏人康熙二年知壽昌令時積年奇荒民多逋賦桂招集流亡寬恤緩徵獄無羈囚奏最去

張鵬陝州人康熙乙未進士事所後父母得其歡心友愛昆弟淹通經史尤邃於易仕古浪令舊屬衛所時新改爲縣察土俗民情政簡而寬邑人勒碑志之祀古浪名宦

張鷟陝州人康熙庚子舉人任江南蕪湖令調霍邱並有惠政致仕歸修廣濟渠建學使行臺皆竭力爲州人倡著四書精解

屈允高靈寶人進士授定陶令廉正不阿調單縣盡瘁河工多捐已俸工得告成

張可選靈寶人進士任章邱令服官廉潔時地方多變城守有方以勞卒于官

光州

王說字長康商城人陝西巡按王倓子諸生明末獻賊攻縣城率衆守禦殺賊甚衆並磔其愛姬及城陷罵賊死妻張氏亦痛哭罵賊賊怒刃之適其僕周元福負其子略至張執略手顧福曰此兒托汝夫婦遂匍匐死於夫屍之側元福負略並攜已子行突遇賊賊曰汝負貴家兒逃耶曰吾兒也因指福子曰又汝兒耶曰王巡按孫也賊遂殺元福子並斫元福而略竟脫於難福被創甚囑妻敖氏負略行遷播流離間執

僕禮益謹役十餘年福奉略還商妻已死福亦老矣
猶佐略力學略後授宜陽司訓

陳棐光州人順治間知泰興縣邑中伏莽與援將相抗
棐守禦策應盡協機宜寇盜屏息丈田畝均賦役平
獄訟繕學宮以最擢御史

李爲極字用之光州人知建德縣時兵燹後百姓多逃
亡餘孽尚未靖爲極招撫勦除勸課農桑邑民賴之
唐瑾字雪靈光州人順治丙戌進士授嘉定令邑民嘗
苦折漕以瑾力請得免好獎士類具人倫鑒沈荃毛
贊皆所特拔士內艱服闋補青浦令地瘠賦繁瑾審
圖均役民尤德之轉新城令罷歸

胡延年字蒼恒光州人順治間知金壇縣湖寇薄城肆
焚掠延年星馳赴郡以大帥劉良佐兵至身自臨陣
殺賊城賴以全其餘孽有逸去者不數日復集延年
復擊敗之遂修城闔葺縣治興文教以督課諸生撫
按交薦擢工部主事

劉泗字孔源光州舉人授鉛山令時閩省流移饑民數
千泗捐俸各給銀米存活者甚衆課最薦擢卒於官
胡喬年字天木光州人進士性孝父母相繼病衣不解
帶者數年授羅源令清積逋決滯獄嘗慮遠民納課
鬻穀爲艱詳令各鄉設倉准價徵收民甚便之

方濟奎字若水光州人進士授貴縣令邑雜處獠獞凋

察多逋賦奎招集流亡給牛種三年內開墾田數百頃勸學作士邑數百年無科名亦獲破荒值歲旱土目負欠糧上官疑其叛欲勦之奎親爲撫諭得完正供事遂寢土人多蒙全活爲立威惠祠

楊毅治字觀烈光州人康熙戊辰進士選庶常以疾歸里後病痊戒行有期因兄衰年伶仃不忍去遂弗果卒祀鄉賢

王初集字體仁光州人康熙乙卯舉人授江南豐縣令建義塾捐俸買田五十畝以給膏火卒于官其善政如脩學宮建高廟輯邑乘至今猶有存者

石拱極字天一光州人進士初授靜海令調任吳江奉檄將行念靜海歲歉邑多逋賦終遺百姓累稱貸代完泄吳江任後葺學校減火耗善政多端以疾卒于官子瑤燦癸卯舉人授石埭令亦有治聲


吳士功字惟亮固始人雍正癸丑進士選庶常歷御史言事有直聲出爲濟東道歷陝西按察使調湖北秦民悍輕犯法楚民黠巧舞法士功兩治之獄多平遷陝西布政巡撫福建時臺灣以颶風告內數郡復旱士功奏請發粟緩租民免流亡閩苦多盜士功至不數月次第就縛又奏寬臺灣私渡之禁便閩粵人之在臺作業者得迎父母妻子以自完其家室臺民德之後坐事發北路軍營効力尋免歸卒于家

王化字道久光州人任浙江許村鹽大使值海鹽場
盡漂沒竈丁率多逋賦化為按甲清查招徠安集輯
之公私攸賴分委監築塘工亦有勞績以勞乞歸

陳憲光州人原籍山陰雍正十二年就黃平州幕時逆

苗煽亂與知州羅鳴序同時殉難

賜祭葬贈國子監學錄祀州忠義祠



續河南通志卷之五十六終

文獻丁卯

